
ՔԱԶ ՆԱԶԱՐԻ ԿԵՐՊԱՐԻ ԹՈՒՄԱՆՅԱՆԱԿԱՆ ՄԵԿՆԱԲԱՆՈՒԹՅՈՒՆԸ

ԼՈՒՄԻՆԵ ՀԱՅՐԻՅԱՆ

Ժողովրդական հեքիաթները գեղարվեստորեն մշակելիս Հովհաննես Թումանյանն անցնում է ստեղծագործական բուռն և բարդ ճանապարհ, որը հարուստ է ծանրակշիռ հայտնագործություններով: Հեքիաթագիրը ժողովրդի մեջ խորագիտորեն փնտրում է բազմաշերտ ու խրթին հարցերի պատասխանները. «... նա (ժողովուրդը – Լ. Հ.) խոսում է հազար ձևերով ու արտահայտություններով. միայն հարկավոր է կարողանալ էդ գտնել, նկատել ու տեսնել»¹, – ասում էր բանաստեղծը՝ հավերժական հարցերի պատասխանները, հնախույզի համառությամբ, մակաբերելով «ամենաբարձր ստեղծագործություններից»²՝ հեքիաթներից:

Թումանյանը մշակման ենթակա է համարել ժողովրդական այնպիսի սկզբնաղբյուրներ, որտեղ, ինչպես իրավացիորեն նկատում է Ս. Գուլակյանը, արտահայտվել են «ժողովրդական խելքն ու աշխարհայացքը», որոնք էլ հանդիսացել են «ժողովրդի սոցիալական ու բարոյական» ըմբռնումների արտահայտման միջոցներ և համընկել «գրողի սեփական ըմբռնումներին»³:

Ամենատես երգիծանքը չափազանցությունների որոշակի չափաբաժնով. անհամայնական իրապատում հեքիաթների առանձնահատուկ բանաձևը, որի միջոցով հեղինակը կերտում է իրական կենցաղային միջավայր ու բնավորություններ, միջանձնային և հասարակական հարաբերություններ, բարձրացնում լուծում պահանջող խնդիրներ⁴: Եթե Թումանյանը ժողովրդական հեքիաթի կատարելատիպ էր համարում «Հազարան Բլբուլը», որի հետ կարող էր համեմատվել միայն հունական առասպելաբանության «հարստություն»-ը⁵, ապա ժողովրդական հեքիաթների սեփական մշակումների գագաթին տեսնում էր «Քաջ Նազար» հեքիաթը: «Իմ կարծիքով, – խոստովանել է հեքիաթագիրը, – ես միայն մի հեքիաթ եմ մշակել կարգին (գուցե չնչին պակասություններ ունենա, ով գիտի), և դա

¹ Լ. Թումանյան. Թումանյանը քննադատ, Երևան, 1939, էջ 32:

² Տե՛ս Լ. Թումանյան. Հուշեր և գրույցներ, Երևան, 1969, էջ 233:

³ Տե՛ս Ս. Ս. Գուլակյան. Հովհաննես Թումանյանի «Քաջ Նազար» հեքիաթի գաղափարական իմաստը. – «Տեղեկագիր» Հայկական ՍՍՌ գիտությունների ակադեմիայի, 1965, -9, էջ 113:

⁴ Տե՛ս Հայ նոր գրականության պատմություն, հ. 5, Երևան, 1979, էջ 321:

⁵ Տե՛ս Լ. Վ. Թումանյան. Հուշեր և գրույցներ, Երևան, 2009, էջ 206:

«Քաջ Նազարն»⁶, որը պատրաստ էր աներկյուղ հանձնել «ամբողջ գրական աշխարհի քննությանը»⁷:

Հեքիաթի ստեղծագործական աշխատանքը Թումանյանն իրականացրել է ձեռքի տակ ունենալով հետևյալ աղբյուրները՝ Գ. Մրվանձտյանի հայկական հեքիաթների ժողովածուն, Գ. Տեր-Աղեքսանդրյանի «Թիֆլիսեցոց մտավոր կյանքը» գիրքը, Ա. Ն. Աֆանասևի ռուսական ժողովրդական հեքիաթները, Գրիմ եղբայրների հեքիաթները, «Сборник материалов для описания местностей и племен Кавказа»- ի մի քանի հրատարակությունները, «Сборник сведений о Кавказских горцах» գիրքը՝ իր հեքիաթի համար որպես հիմք ընդունելով հայկական «Դժիկոն» հեքիաթը⁸:

«Քաջ Նազարը» անարժան մարդու անսպասելի հաջողության պատմությունն է, որը, լայն տարածում գտնելով կովկասյան և այլ ժողովուրդների բանավեպտում, չի վրիպում հեքիաթագրի այքից, այսպիսով՝ «քաջնազարականության» թեման ներմուծելով հայ գրականություն և առաջացնելով նազարականություն կամ նազարիզմ թեմատիկ ուղղությունը⁹:

Հեքիաթն «ամենատաղանդավորը և հասարակության դաստիարակության տեսակետից ամենաուսանելին» որակումն է ստանում¹⁰, քանզի ողջախոհության հավերժական կոչ է, որը նպաստում է հասարակական անառողջ ցնցումների կործանարար հետևանքների մերկացմանը: Հատկապես կեղծ հեղինակությունների ետևից շարժվելու կործանարեք վտանգի գիտակցումն է ստիպում Թումանյանին գտնել հասարակական առաջընթացն ապահովող հավերժական շարժիչը, ճշգրիտ բանաձևը, ինչն հաջողվում է վերջինիս «խորը, անծայր, հարուստ ու շքեղ» «հավերժական սիմվոլների»¹¹ տիրույթում:

«Քաջ Նազարը» համամարդկային ընդհանրացումների, ինչպես նաև ազգային բնավորության, աշխարհընկալման ընդերքի պեղման յուրօրինակ և հաջողված աշխատանք է, որտեղ հեղինակը ցուցաբերում է հոգեբանի խորագիտություն՝ ներկայացնելով անձի և հասարակության ներսում հաճախ ենթագիտակցական մակարդակում կատարվող փոփոխություններն ու տեղաշարժերը: Ժանրի թելադրանքով՝ Թումանյանը չի զբաղվում հոգեվերլուծությամբ, սակայն թույլ է տալիս ընթերցողին հասկանալ հերոսի վարքի ներքին դրդապատճառներն ու պատկերացում կազմել ամբոխային հոգեբանության մասին: «Քաջ Նազարի» հոգեբանական խորքը հանճարեղաբար նկատում է դեռևս Ն. Աղբալյանը՝ որակելով նյութը «խորապես հոգեբանական և իմաստասիրական» ստեղծագործություն, որից

⁶ Տե՛ս Ն. Թումանյան. Երկերի լիակատար ժողովածու, հ. 5, Երևան, 1994, էջ 787:

⁷ Տե՛ս նույն տեղում, էջ 734, Ն. Թումանյան. Երկերի ժողովածու, հ. 5, Երևան, 1945, էջ 471-472:

⁸ Տե՛ս Մ. Ա. Գումրիկյան. նշվ. հոդվ., էջ 114:

⁹ Տե՛ս Մ. Մելքոնյան. Ոչ միայն հացիվ, Երևան, 1987, էջ 286:

¹⁰ Տե՛ս Ա. Մարտունի. Հովհաննես Թումանյանի ստեղծագործության սոցիալական արժեքը (սոցիոլոգիական ակնարկ), Թիֆլիս, 1923, էջ 32 և Ա. Վարդանյան. Հովհաննես Թումանյանի հեքիաթները, Երևան, 1986, էջ 145:

¹¹ Տե՛ս Ն. Թումանյան. Հուշեր և զրույցներ, էջ 233, Ն. Թումանյան. Երկերի ժողովածու, հ. 5, էջ 472:

«պայծառ լույս է ընկնում... մարդկային պատմության և առօրյա կյանքի վրա...»¹²:

Նազարի պատմությունն ընդունված է համարել անարժան վախկոտի անսպասելի հաջողության պատմություն, որտեղ հերոսը ցուցաբերում է ակնհայտ պասիվություն, իսկ որոշումներ կայացնողը ստրկամիտ հասարկությունն է¹³՝ հերոսին շրջապատող միջավայրն իր գրոտեսկային վերագրումներով: Մեր կարծիքով, սակայն, իր ճակատագրում Նազարի խաղացած դերի և ազդեցության խնդիրը լուծված չի կարելի համարել:

Թումանյանի հերոսը ճարպիկ խաբեբա չէ. փոքրիկ դիպվածը ստիպում է սեփական վախերից, անճարությունից տառապող մարդուն փոխել պատկերացումները իր իսկ անձի վերաբերյալ, ազնվորեն հավատալով իր նորահայտ «ընդունակություններին», զբաղվել ինքնախաբեությամբ, որը հետագայում վերածվելու էր մեծ խաբեության:

Հեքիաթում հակադրվում են իրավիճակը սթափ գնահատողներն ու անոմալ ընկալողականություն ունեցողները, որոնք ամեն ինչ շրջում են գլխիվայր: Ընտանիքում և հայրենի գյուղում ճանաչում են, գիտեն Նազարի էությունը: Իսկ «նոր աշխարհում» նրան խորաթափանցորեն «տեսնում է» միայն իրատես ձին, որին չի շփոթեցնում կատակով գրված, բայց անհերքելի ճշմարտություն համարվող երկտողը: Հեքիաթի առաջին իսկ կոնֆլիկտային միջադեպից առավել ցայտուն է ընդգծվում հեղինակի և հերոսին շրջապատող միջավայրի համակարծությունը Նազարի ով լինելու վերաբերյալ:

Հերոսին հատուկ է պարծենկոտությունը, որով վերջինս փորձում է սքողել սեփական թերաբժեքությունն ու ներկայանալ որպես «իսկական տղամարդ»՝ մեկը, որ կարող է ինքնուրույն որոշումներ կայացնել ու իրականացնել դրանք. «– Ա՛յ կնիկ, ինչ քարվան կտրելու գիշեր է՛... սիրտս ասում է վեր կաց գնա Հնդստանից եկող շահի քարվանը կտրի, բեր տունը լցրու...»¹⁴:

Իրենց գյուղում վախկոտի համբավ վաստակած Նազարի շուրթերից նման ցանկությունների արտաբերումը լավագույն դեպքում տարօրինակ պետք է հնչեր: Կնոջը հակադարձելով՝ Նազարը կշտամբանքի այնպիսի բառեր է նետում, որոնք թույլ են տալիս ենթադրել, որ վերջինս սեփական անշնորհքության և նույնիսկ ալարկոտության համար մեղադրում է կնոջը (այստեղ խոսում է Նազարի «Ֆանտաստիկ եսը»՝ «ինքնագիտակցության բաղադրիչներից» մեկը, որը հատուկ է պատանեկան տարիքին և իր մեջ ֆանտաստիկ պատկերացումներ է պարունակում)¹⁵: Վերջինս բարձրաձայնում է «իսկական տղամարդ» դառնալու իր պատկերացումները, որոնց իրականացմանը, իր կարծիքով, խոչընդոտում էր «անզգամ կինը». «–

¹² Տե՛ս «Հորիզոն» (Թիֆլիս), 23. X. 1912:

¹³ Տե՛ս Հայ նոր գրականության պատմություն, հ. 5, էջ 333, Մ. Ա. Գ ու Լ ա կ յ ա ն. նշվ. հոդվ., էջ 114-115, Ա. Ե դ ի ա գ ա ր յ ա ն. Երեք հեքիաթ.– Ոսկե Դիվան, Հեքիաթագիտական հանդես, պր. 1, դեկտեմբեր, 2009, էջ 124 – 129, Մ. Մ է Լ ք ո ն յ ա ն. նշվ. աշխ., էջ 285–307, Էդ. Մ. Ջ ր բ ա շ յ ա ն. Գրականության պատմա-գործառական ուսումնասիրության սկզբունքները.– «Բանբեր Երևանի համալսարանի», 1987, -3, էջ 16-21:

¹⁴ Տե՛ս Ա. Թ ու մ ա ն յ ա ն. Երկերի ժողովածու, հ. 5, էջ 235:

¹⁵ Տե՛ս Մ. Ա. Ն ա Լ չ ա ջ յ ա ն. Էթնիկական հոգեբանություն, Երևան, 2001, էջ 50:

Անզգամ կնիկ, ինչու՞ չես թող անում՝ ես գնամ քարվան կտրեմ, բերեմ տունը լցնեմ: Էլ ի՞նչ տղամարդ եմ ես, էլ ինչո՞ւ եմ գդակ ծածկում, որ դու համարձակվում ես իմ առաջը խոսես»¹⁶: Ամուսնու ճորտախոսությունը կինն ընդունում է որպես մարտահրավեր՝ դիմելով կոնկրետ քայլերի: Նազարի առջև փակվում են տան դռները՝ դռներ, որոնց ետևում հայտնվելով վերջինս թեպետ ճարահատ, սակայն պետք է ինքնուրույն որոշումներ կայացնեք, ինքնուրույն գործեր ու ինքնահաստատվեր: Վախկոտ-ալարկոտը, կարծես թե, առաջին անգամ սկսում է մտածել. «...խոռված, պատի տակին արևկող արած սպասում է, որ կնիկը գա, տուն տանի, ու միտք է անում»¹⁷ (ընդգծումը մերն է – Լ. Ն.):

Թումանյանը վարպետորեն է ներկայացնում կենտրոնական կերպարի հոգեբանական փոփոխությունները. գրկվելով կնոջ հովանավորչությունից և տուն վերադառնալու հնարավորությունից՝ Նազարը վարկարեկում է անհասանելի դարձած նպատակը՝ բարձր պահելով ինքնահարգանքն ու ինքնագնահատականը:

Մի զարկով մի քանի ճանճ սպանելը ստիպում է վերջինիս «կարևոր և լուրջ» ինքնավերագրումներ կատարել՝ տեսնելով իր մեջ հատկանիշներ, որոնք չունեն և երբեք էլ չէր ունենալու, սակայն համառորեն ցանկանում էր տեսնել (դրական ինքնագնահատական ունենալու պահանջ). ինքն՝ «իսկական տղամարդու կատարելատիպ», որին վայել չէր գտնվել «անպիտան կնկա» կողքին. «–Վա հ, – ասում է, – ես էսպես տղամարդ եմ էլել ու մինչև էսօր չեմ իմացել ... Ես, որ մի զարկով կարող եմ հազար շունչ կենդանի ջարդել, էլ ի՞նչ եմ էս անպիտան կնկա կողքին վեր ընկել...»¹⁸:

Հաջողության հասնելու ճանապարհին Նազարը կայացնում և իրագործում է երկու կարևոր որոշում՝ պատվիրում է արձանագրել իր, այսպես կոչված, սխրանքն ու, փափագելով հանրությանը նորովի ներկայանալու հույսն, ուղղակի փոխում միջավայրը. «– Տե րտեր, բա չես ասիլ՝ էսպես-էսպես բան:

Պատում է իր քաջագործությունը ու հետն էլ հայտնում է, որ պետք է իր կնկանից կորչի, միայն խնդրում է՝ իր արածը տերտերը գրի, որ անհայտ չմնա, ամենքն էլ կարդան, իմանան»¹⁹:

Եթե ժողովրդական հեքիաթի Դժիկոն, ավարական հեքիաթի Նազնայր տանից հեռանալուց հետո են ճանճերը սպանում, ապա Թումանյանի Նազարը ճանճերը սպանելուց հետո է վճռում վերջնականապես լքել տունն ու հարազատ միջավայրը, որն ուշագրավ մանրամասն է. Թումանյանի հերոսն ինքն իրեն վերագնահատելուց և արժևորելուց հետո է միայն լքում իր տունը²⁰: Ինքնավեհացման «սրբազան ծեսը» կատարված էր. Նազարն անելիք չունեն մի միջավայրում, որտեղ չեն նկատում իր «արժանիքները», և որոշակի ակտիվություն է ցուցաբերում: Ներքին փոփոխությունների և հանգամանքների բերումով՝ Նազարը տեղափոխվում է առավել

¹⁶ Տե՛ս նաև Թումանյանի Երկերի ժողովածու, հ. 5, էջ 235:

¹⁷ Տե՛ս նույն տեղում, էջ 236:

¹⁸ Նույն տեղում:

¹⁹ Տե՛ս նույն տեղում:

²⁰ Տե՛ս Մ. Ա. Գուլազյանի նշվ. հոդվ., էջ 115:

նպաստավոր միջավայր՝ առանձնահատուկ հոգեպայթյունով ունեցող խումբ²¹, բնավորության պարադոքսալ գծերով օժտված հասարակություն, որն ամեն ինչ տեսնում և մեկնաբանում է յուրովի, պլակատային զգայական պատկերը նույնացնելով Նազարի հետ, կարողանում է հեշտությամբ ընդունել վերջինիս կարծեցյալ քաջությունը, հավատալ դրան՝ կերպավորված վախկոտությունը գունավորելով նորանոր առաքիներություններով:

Գյուղական քահանան, կատարելով վախկոտ Նազարի ծիծաղելի և անտրամաբանական թվացող խնդրանքը, ստեղծում է երկտող, որը հոգեբանական ներագդեցության գործիք է վերածվում՝ դնելով Նազարի առասպելական պատմության հիմնաքարը. ինքնավեհացման և անհատի իդեալականացման մի տխրահոշակ պատմություն, որի նախատիպերը կարելի է մակածել համաշխարհային պատմության տարբեր փուլերից՝ գտնելով «հնության առասպելական հերոսի՝ Պրոմեթեոսին հավասար բարձրության» հասցված անհատներին²²: Լաթի վրա դրոշմված «բնութագրականով»՝ աննշան արարքը հերոսականացվում, ստերեոտիպացվում է՝ դառնալով «տարատեսակ հաղթանակներ» սկզբնապատճառ: Ստերեոտիպացման արդյունքում հաջողության են հասնում նաև Թումանյանի «Չախչախ թագավորն» ու «Անբան Հուրին», որոնք, ի տարբերություն Նազարի, ազատված են ինքնուրույն որոշումներ կայացնելու պարտականությունից: Ամեն ինչ այլ է Նազարի պարագայում. սեփական «սխրանքները» հանրաձանոթ դարձնելու ձգտումը, պաշտպանություն ու հովանավորություն կորցրած մարդու ինքնապաշտպանական փորձ կարելի է որակել: Եթե Նազարի հոգեկան պահանջմունքն էր ձեռք բերել ճանաչում, ապա միջավայրի հոգեբանական պահանջմունքն էր «իդեալական առաջնորդ» ունենալը. արդյունքում վախկոտը դառնում է «քաջ ու անհաղթ», քանի որ ինքնախաբեությամբ զբաղվող Նազարը գտնում է ինքնախաբեության ախտով տառապող ամբոխին: Թեպետ տարերայնորեն, այսինքն՝ չունենալով որոշակի ծրագիր, այնուամենայնիվ, Նազարը հասնում է իր նպատակին՝ այսպես կոչված քաջագործությունը հրամցնելով ամենքին՝ վայելելով արագահաս փառքի քացր պտուղները, որոնք սիրահոժար նվեր էր ստանում և իր շինծու կերպարը զարդարում նոր զարդաքանդակներով. «Նազարը որ ուշքի է գալի, լեզուն բացվում է. «Ափսոս ն, ասում է, - ընչի՞ սպանեցիք զոռով մի ձի էի շինել, նստել ... էնքան պետք է քշեի ո՞ր ...»²³:

Իր հանճարին հատուկ սրատեսությամբ՝ հեքիաթագիրը ներկայացնում է անհատի առասպելականացման ուշագրավ պատմություն, խուսափելով էթնոցենտրիզմից (ազգակենտրոնություն), ինչն առավել տեսանելի է դարձնում հեքիաթի վերջաբանը՝ հաստատելով ստեղծագործության համամարդկային և պաշտպանական՝ հոգեբուժական, նշանակությունը:

«Քաջ Նազարը» սուկ գրոտեսկային դեպքերի շարադրանք չէ. հեքիաթագիրը խոսում է առասպելակերպ գաղափարի և պատկերացումների մասին,

²¹ В. О да й н и к. Психология политики. Ювента, 1996, с. 30.

²² Տե՛ս Մ. Գ ո ռ կ ի. Գրական - հրապարակախոսական հոդվածներ, Երևան, 1949, էջ 293:

²³ Տե՛ս Հ. Թ ու մ ա ն յ ա ն. Երկերի ժողովածու, հ. 5, էջ 242:

որոնք գործում են հասարակական գիտակցության որոշակի ոլորտներում՝ վերածվելով իրականության պատրանքային արտացոլանքի: Հասարակական գիտակցության վրա ներազդելու և մարդկանց կառավարելու մղումը տարբեր նպատակների համար ենթադրել և ենթադրում է տարաձև ու տարատեսակ միջոցներ, որոնցից հաճախ ամենաարդյունավետը շարադրանքի որոշակի ոճ, իրականության որոշակի հատիկներ պարունակող առասպելակերպ կառույցների արարումն ու կիրառումն է, որոնց ստեղծմանն ու տարածմանն ակտիվ մասնակցություն է ցուցաբերում հասարակությունը կամ հասարակության մի հատված՝ դրանով կերտելով իդեալական առաջնորդի կերպար: Իդեալական առաջնորդի կերպարակերտումը կատարվում է նաև սոցիալական խմբի հոգեբանական պահանջմունքների հիմքով ու հաճախ սոսկ պատկերացումների և վերագրումների միջոցով: Թումանյանի հեքիաթի նախաշերտերի հիմքում ընկած է վերոհիշյալ երևույթը:

ТУМАНЯНОВСКАЯ ТРАКТОВКА ОБРАЗА КАДЖ НАЗАРА

ЛУСИНЕ АЙРИЯН

Резюме

Литературная обработка народных сказок стала для Туманяна полем нововидений и открытий. Таким стал для него и «Кадж Назар». Это история удачливого, но недостойного человека, которую Туманян вводит в армянскую литературу, создавая целое тематическое направление назаризма. Туманяновского центрального героя принято считать пассивным героем, который не играет существенную роль в своих удачах, однако тщательный анализ показывает, что процесс назаровского самоутверждения и возвышения происходит по активному вмешательству главного героя. Для достижения известности Назар применяет два важнейших действия: во-первых, просит местного священника констатировать так называемый героический подвиг, а во-вторых, это своеобразное орудие воздействия и вовлечения перемещает в другую общность, который с легкостью и охотой верит в героизм Назара и обогащает миф, созданный вокруг его имени. Это сказка имеет оборонительную значимость, которую утверждает сказочная концовка.

TOUMANYAN'S RENDERING OF KAJ NAZAR'S IMAGE

LUSINE HAYRIYAN

Summary

Developing national tales, H. Toumanyán has passed a furious creative way which is rich with discoveries. Toumanyán's "Kaj Nazar" is considered to be an original discovery as Toumanyán

brings the hero of his tale from folklore to Armenian literature making the “Nazarism” one of the eternal themes of Armenian literature. Toumanyán’s central character is considered to be a passive hero, who does not play a significant role in his successes, but careful analysis shows that the process of Nazar’s self-affirmation and elevation occurs on the active intervention of the protagonist. To achieve fame, Nazar applies two main steps: firstly he asks the local priest to enlist the so-called heroic deed, and secondly Nazar moves the weapon of retraction and efficiency to another community which easily believes in Nazar’s heroism and enriches the myth created around his name. This story has a defensive meaning, which claims a fantastic ending.